

Koleksi Cerita Kanak-Kanak

# Burung Gagak Dan Ketitir



## TAJUK: BURUNG GAGAK DAN KETITIR



Sang Gagak menggauk, tandanya hari semakin panas. Sang Gagak mendepangkan sayapnya di angkasa dan terbang berlegar-legar. Seperti biasa, Sang Gagak akan menjenguk rakannya, burung ketitir, di halaman rumah saudagar kaya di pinggir bandar.


Begitu juga halnya dengan Sang Ketitir, Sang Ketitir akan menunggu kedatangan sahabatnya, Sang Gagak. Kelibat Sang Gagak yang sentiasa dikenalnya dapat dilihat dari jauh.

Sang Gagak selalu menganggap dirinya hina. "Mana ada burung lain yang lebih hina daripada aku?" kata Sang Gagak kepada Sang Ketitir pada suatu hari.

"Kenapa engkau berkata begitu?" tanya Sang Ketitir.

Sang Gagak memberitahu bahawa ia mempunyai satu warna sahaja. Hitam. Tidak ada bintik-bintik. Tidak pula

bercorak-corak. "Bukankah aku ini hitam, sehitam-hitamnya?" rintih Sang Gagak seolah-olah menyesal dengan rupa semula jadinya.



"Tidak baik engkau berfikir begitu," pujuk Sang Ketitir. Sang Ketitir memang bernasib baik. Rupa ada dan suara pula merdu. Itulah sebabnya sangkarnya dibeli oleh saudagar dengan nilai beratus-ratus ringgit.

Sang Ketitir tidak perlu terbang ke sana ke mari untuk mencari sesuap rezeki. Segala-galanya disediakan oleh saudagar. Bijirin yang menjadi makanannya dibeli daripada jenis yang terbaik. Pendek kata, makan minum dan sangkarnya dijaga sendiri oleh saudagar yang kaya itu. Sang Ketitir dilayan dengan sebaik-baiknya.

Lain pula halnya dengan Sang Gagak. Terbang ke tempat pelupus sampah, menyelinap di celah-celah timbunan sampah, semata-mata untuk mengais sesuap

rezeki. Hari baik dapat makanan yang baik. Hari yang tidak baik, apa-apa sahaja terpaksa dimakan untuk menyambung kehidupannya sehari-harian.

"Engkau amat bernasib baik, sedangkan aku bernasib malang," rungut Sang Gagak. Namun Sang Ketitir tidak menjawab. Sang Ketitir melihat Sang Gagak melalui celah-celah bilah besi sangkarnya.



Setelah masa berlalu, Sang Gagak bermohon untuk pergi. Kata Sang Ketitir, "Suatu hari nanti, engkau akan tahu, siapa lebih beruntung dan siapa lebih malang?"

Namun, Sang Gagak terus pergi.

Sang Gagak terbang sambil berfikir-fikir akan kata-kata kawannya, Sang Ketitir itu. Sang Gagak terpaksa mencari dahan yang sesuai untuk tidur pada malam itu. Sang Gagak memilih untuk tidur di atas pokok cemara.

Kebetulan, semasa hendak meletakkan mata, pada satu dahan yang lain, Sang Gagak terdengar perbualan dua ekor burung pungguk. Seekor burung pungguk bertanya, "Apakah yang paling baik di atas muka bumi ini, jika engkau tahu?"

Jawab pungguk yang seekor lagi, "Sebagai seekor burung, kita diberi sayap. Dengan sayap yang ada, kita dapat terbang ke mana-mana." Kemudian, burung pungguk itu menyambung lagi, "Itulah yang paling baik bagi kita sebagai burung di atas muka bumi ini."

Mendengar kata-kata itu, gagak menyesal kerana iri hati terhadap kawannya, Sang Ketitir. Timbullah di dalam hatinya perasaan kasihan yang tidak terhingga pada nasib kawannya itu. Pada malam itu, Sang Gagak tidak dapat tidur.



Barulah Sang Gagak itu faham akan kata-kata Sang Ketitir ketika senja tadi. Walaupun dalam sangkar yang cantik tetapi hatinya tidak bebas. Kini, Sang Gagak tahu rupa-rupanya dirinya lebih beruntung dan Sang Ketitirlah yang bernasib malang. Sang Gagak ingin memohon maaf kepada Sang Ketitir kerana terlanjur menganggap Sang Ketitir lebih bernasib baik.

Setelah hari siang, Sang Gagak terus pergi ke sebuah tong sampah yang berdekatan. Sang Gagak bersarapan dengan sisa-sisa jagung yang masih ada pada tongkolnya. Selepas itu, Sang Gagak terus pergi mendapatkan Sang Ketitir.


Dari jauh, Sang Gagak sudah dapat mendengar Sang Ketitir berlagu merdu. Saudagar yang kaya itu senang hati mendengar kemerduan suara Sang Ketitir. Dia mengupah

dengan meletakkan bijirin yang terbaik di dalam sangkar Sang Ketitir itu.

Selepas saudagar itu pergi, datanglah Sang Gagak menemui Sang Ketitir.

"Hai, Sang Gagak! Engkau kelihatan gembira hari ini," tegur Sang Ketitir apabila melihat Sang Gagak berlegar-legar di sekeliling sangkarnya. Namun, kelihatan Sang Gagak pula bersedih.

"Kenapa ini, Sang Gagak?" tanya Sang Ketitir pula. Sang Ketitir hairan kerana Sang Gagak yang ceria, tiba-tiba kelihatan sugul pula. Sang Gagak bertenggok di tepi beranda rumah saudagar berhampiran sangkar Sang Ketitir.



"Sekarang aku telah faham akan kata-kata engkau semalam," jawab Sang Gagak penuh dengan

kekesalan. Sang Gagak kasihan melihat dari celah sangkar, peri nasib Sang Ketitir yang terkurung tanpa dapat terbang ke mana-mana. Benarlah kata burung pungguk itu semalam. Sebagai burung, kebebasan untuk terbang adalah perkara yang terbaik dalam dunia ini.

"Baguslah, wahai Sang Gagak, jika engkau dapat memahaminya," jawab Sang Ketitir.

"Tidakkah engkau ingin lepas bebas?" tanya Sang Gagak kepada Sang Ketitir. Namun, Sang Ketitir tidak menjawab pertanyaan itu. Sang Ketitir bukan sahaja bersuara merdu, malahan juga mempunyai jiwa yang sangat sabar. Sang Ketitir sentiasa tenang dan tahu untung nasibnya.

"Jangan engkau lupa akan nasihatku ini!" kata Sang Ketitir. Sang Ketitir memberitahu Sang Gagak bahawa kerana kemerduan suaranya itulah menyebabkan ia terpenjara.

"Lihat engkau, sungguhpun hanya menggauk dan buruk dipandang orang, namun hal sedemikian membebaskan engkau daripada berbagai-bagai bencana," kata Sang Ketitir. Kata-kata Sang Ketitir itu benar-benar



menimbulkan keinsafan bagi diri Sang Gagak.

Mereka mula memahami berbagai-bagai perkara di atas dunia ini. Mereka bersyukur dengan apa yang ada. Mereka menjadi sahabat yang kekal lama.



## **NILAI MURNI**

*Janganlah kita menganggap setiap ciptaan dan pemberian oleh Tuhan sebagai tiada gunanya. Tuhan Maha Berkuasa dan Maha Mengetahui di atas setiap makhluk ciptaan-Nya.*

*Demikianlah juga halnya, kita tidak boleh bermegah-megah dengan apa yang kita miliki. Bukanlah suatu perkara mustahil, ada orang lain lagi yang memiliki kelebihan yang lebih baik dan tinggi daripada kita. Oleh yang demikian, kita haruslah bersyukur dengan apa yang kita miliki.*

*Kita juga tidak boleh memandang hina terhadap*

*orang yang miskin atau serba kekurangan. Kita haruslah sadar bahwa setiap orang pastilah memiliki kelebihan atau keistimewaan masing-masing.*